

■ COLUMNA

Atgnamain...

MARIA CADRUVI*

Atgnamain vulev'jau vegnir a la fin sin Nadal, hai jau ditg a mia scolasta da far chaltschiel. Lura stos ti dar gas, è stà ses commentari. In pau gas hai jau dà. Ma jau n'hai anc mai en mia vita fatg chaltschiel ina giacca. Pia hai jau fatg in quint avant ch'entschaiver. Per la part davantsi sanester dovrel jau trais dis, per quella dretg medemamain trais, per la part davos sis dis, per mintga mongia dus e per cuser ensemen e far il finish era anc dus. Total 18 dis. Igl era l'entschatta december. Pia nagin problem. Atgnamain.

Lura è l'enviern vegnì ed jau hai gidà a far or la naiv. Lura è s'intensivada la segunda unda ed jau hai reorganisà la festa planisada per Son Steffan – quai vul dir disponì enturn per far or dad ina festa in pau pli gronda quatter festas pli pitschnas. Lura è la bell'aura vegnida ed jau hai gè dapli gust dad empruvar ils novs chalzers da naiv che da far chaltschiel. Lura hai jau cumprà insaquants cudeschs ch'èn cumparids da curt ed hai cumenzà a leger lien. E lura ha mes um tratg endament che nus vulevan gea far quest onn per amias ed enconuschents ina cartulina da Nadal e Bumaun in pau pli speziala e ch'i fiss plaunsieu da far pa-



tratgs surlonder. Ma atgnamain vuleva jau gea far chaltschiel ina giacca per mai, ina en pinc or d'ina bellezza launa merino. Far cunzunt quai - e lura è tut tschai vegnì tranteren. Mintgatant è tschai stentus e dolurus, ma i dat che tschai è almain uschè attractiv e captivant sco quai.

Cristoffel Columbus vuleva atgnamain chattar ina nova via maritima en l'India. Ma arrivà è el en l'America. La Queen Elizabeth na vuleva atgnamain betg daventar regina gia cun 26 onns. Ma damai che ses bab è mort gia cun 56 onns n'ha ella betg vesì autras letgas. In um m'ha raquintà avant insaquants onns ch'el na saja atgnamain betg stà a la tschertga d'ina nova relaziun curt suenter ina separaziun. El saja simplamain, ord spir lungurella, ì ina giada sin pars-hip – cun in success cumplain gia l'emprima giada. Atgnamain casualmain.

Atgnamain avevan ils blers da nus auters plans per quest 2020. Ma lura è tschai vegnì. Tar la revista da la fin da l'onn na vuless jau betg vesair sulettamain quai ch'è stà da stritgar. Jau vi era ma regurdar da quai ch'è vegnì vi-tiers. Tar mai e tar auters. Grazia a las medias hai jau udì dad ideas zunt creativas. Ed en la bilantscha persunala dals blers da nus datti franc era muments ed eveniments fitg prezios – banals forsa, ma divertai-vels. Da quels ch'èn atgnamain stads pussaivels quest onn sulettamain perquai ch'igl è vegnì auter.

Suenter mez mars è il termin vegnì stritgà che mes um aveva atgnamain gia reservà tar sia coiffeusa. Uss stos ti tagliar ils chavels a mai, ha el manegià. Donn che nus n'avain betg fatg in video da questa acziun. Igl è stà risaglias. En tge stanza tagliar? Cun tge forsch? Tenor tge sistem? E danunder prender insatge sco in man-letet per curclar las spatlas?

Emia giacca? Lezza dovra anc in pau dapli temp. Ma en stgaffa hai jau gea anc autras giaccas. Pia nagin problem. Atgnamain.

Maria Cadruvi, schurnalista, stat a Ruschein e maina ina «impulseria». Mintgatant dat ella in curs, mintgatant zambregia ella vi d'in text. Chaltschiel fa ella mo darar.